



“Tu jeris di Muzane se...

par fuarçe, daspò vê gustât, tu “vevis” (voce del verbo “scugnire”) di lâ a polsâ... cence nissune sium, voe o no voe! Il gno pinsîr al jere dut par chê bici di om che dome gno fradi al podeve doprâ e cussì a ore di mirie, ducj i Battei a polsâ, o soi sbrissade fûr intal curtîl plen di soreli di svuarbâ: o vevi ben smicjât cemût ch’al faseve gno fradi. Gjambe çampe sot dal cambron, a cjalval dal carter e pît intal pedâl, gjambe drete prin par tiere e a piçui sburts dopo inviâde la corse, sul pedâl.

Massime concentrazion e viiie... a voi spirtâts su la ruede, lis mans brincadis al manubri, dopo cualchi sghirlade la bici e va drete e cun fuarce, i doi, duncje, sot cui pedâi...

Un sdrondenon di no crodi intal cidinôr di chel dopodimisdi plen di soreli in bore e la frute si cjate dute intorcolade jenfri ruede, carter, cambron e manubri. Scuasi svignude a sintive lis vôs inc...adis (in piavot, ch’al è piês dal furlan) di chê disdrumarie di parincj cence rivâ a capî ce dal djaul ch’al jere sucedût: “Ma cemût la bici e jere ben drete o jeri cussì ben inviade cui pedâi... ce puedial jessi capitât?” Çusse di frute no tu ti vevis innacuarde che il curtîl al jere finût e il puarton sierât t’al à fât capî ben e no mâl!!!”

di Barbara Battel